

TAARIFA FUPI KUHUSU SERA YA TAIFA YA ELIMU



TANZANIA EDUCATION NETWORK /
MTANDAO WA ELIMU TANZANIA (TEN/MET)

1.0 USULI

Tanzania, sawa na nchi nyingine, ilitia saina Malengo ya Maendeleo ya Milenia na Malengo ya Elimu kwa Wote - yaliyoridhiwa mwaka 2000 na kutekelezwa hadi mwaka 2015. Ajenda ya sasa ya maendeleo ya nchi huongozwa na nyaraka nyingi zikiwemo Malengo ya Maendeleo Endelevu (SDGs), Ajenda ya Elimu 2030 na Mkakati wa Elimu wa Bara la Afrika (CESA). Serikali imepiga hatua kubwa katika kutimiza malengo ya kitaifa ndani ya muktadha wa malengo ya dunia/bara na hadi sasa imeonesha kuwa na msimamo thabiti wa kutekeleza malengo mapya kwa kuandaa Mpango wa Kuendeleza Sekta ya Elimu. (ESDP 2016/17 - 2021/22). Mpango huu unajenga juu ya jitihada za awali katika kutekeleza mpango wa elimu ya msingi bila malipo hapa Tanzania - unaoongozwa na Mkakati wa Elimu Jumuishi Kitaifa (2009-2017) na unaambatana na SDG4&5 *ya elimu bora jumuishi ya haki sawa inayohimiza fursa za watu wote kuendelea kujifunza maisha yao yote.*

Lengo madhubuti la serikali la kuwezesha elimu jumuishi lilidhihirishwa na utoaji wa **Tshs bilioni 16 kwa watoto wenye mahitaji maalum mwaka 2016**. Kwa hiyo, haishangazi kwamba Tanzania imesifiwa kama nchi mojawapo iliyofanikisha malengo ya MDG na EFA katika miaka 15 iliyopita. Maendeleo yaliyopatikana yamethibitishwa kwa ongezeko la idadi ya wanafunzi kujiandikisha – kutokana na kuondolewa kwa ada mwaka 2001. Kiwango cha Uandikishaji wa Jumla Shuleni (GER) kiliongezeka kufikia 85.6%, wakati kujiandikisha kwa ujumla ilifikia watoto 8,639,202 (ESA, 2016). Kwa mujibu wa ESA, GER kitapanda kufikia 100% kadiri watoto wanavyoongezeka kuandikishwa: 11,476,803 mwaka 2024. Hii inakadiriwa kuwa ongezeko la 30.5% katika miaka 10.

Wakati wa kutathmini maendeleo hadi sasa, wadau wa elimu kutoka serikalini na Asasi za Kiraia walikutana kuanzia **tarehe 15-16 Mei 2017 huko Blue Pearl Hotel Dar es Salaam** na kutafakari kwa kina maendeleo pamoja na changamoto zilizopo katika sekta ya elimu. Yafuatayo ni mapendekezo ya sera yanayotokana na mkutano huu na yanawasilishwa kwa serikali ili wayazingatie - kufikia elimu jumuishi kwa wote kwa misingi ya haki sawa kwa muda mfupi zaidi.

Changamoto zilizotambuliwa za sekta ya elimu zinazohitaji kufikiriwa kwa kina - wakati wa kusonga mbele - ni pamoja na yafuatayo:

- 10% ya Watoto wenye Mahitaji Maalum ya Elimu (CSEN) wako shuleni hapa Tanzania. Hii ina maana kwamba watoto walio wengi wameachwa nyuma. Zana za Kufundishia na za Kujifunzia hazitoshi kwa kikundi hiki cha watoto pamoja na kukosekana kwa walimu wenye stadi na taaluma maalum za kuwafundisha Watoto wenye Mahitaji Maalum ya Elimu. Kwa hiyo, Watoto wenye Mahitaji Maalum ya Elimu wako miongoni mwa kundi kubwa la watoto wanaofanya vibaya katika masomo yao, wanaokaa shuleni muda mrefu kuliko inavyotegemewa au kuacha shule kabisa. Hii inamaanisha pia kwamba Mkakati Jumuishi Kitaifa (NIS, 2009 – 2017) unapaswa kupitiwa kwa kina ili kulenga kwa makusudi wanaostahili

kunufaika na pia kuendana zaidi na hali halisi.

- Miundombinu ya shule haitoshi - Uwiano kati ya Wanafunzi na Darasa (PCR) ni 1:80, Choo na wanafunzi ni 1:55 kwa wastani, badala ya 1:22.5 ambacho ni kiwango tarajiwa na dawati/wanafunzi ni: 1:4.3 badala ya 1:3, ambacho ndicho kiwango. Kwa hiyo matokeo ya mafunzo huathirika.
- Usawa kijinsia ni 50% (2016) kwenye shule za msingi jambo ambalo linamaanisha kwamba Tanzania iko mbali na kufikia usawa kijinsia - kwa kuwa malengo kitaifa na kidunia hayajafikiwa tangu 2005.
- Kuondolewa kwa ada ni mpango mzuri ambao uliwawezesha wazazi kubeba gharama zingine za moja kwa moja za elimu ya msingi. Wazazi walichangia chakula shuleni na pia walilipia gharama za mitihani ya mwezi na maandalizi ya mitihani ya mwisho. Lakini gharama hizi zimekuwa mzigo mzito mno kwa wazazi jambo ambalo limesababisha watoto wa kaya maskini kuacha shule.
- Ruzuku ya \$10 kwa kila mtoto iliyoanzishwa mwaka 2001 sasa haitoshi kutokana na kupungua kwa thamani ya shilingi baada ya miaka yote hii. Wakati, mwaka 2001, dola moja ilikuwa sawa na Tshs 10,000 Tanzania, leo dola ni sawa na Tshs 2,200. Kiuhalisia, imekuwa sawa na \$5 ukizingatia kwamba mtoto hapokei hizi \$10 moja kwa moja.
- Ingawa Sera ya Elimu ya Awali ipo, mafanikio ya sera hii ni madogo sana. Elimu ya Awali ilijumuishwa moja kwa moja katika elimu ya msingi (2014) lakini shule nyingi hazina madarasa mazuri ya elimu ya awali. Sekta ya shule za awali hazina walimu wenye stadi wa kutosha wa kuweza kuwapatia watoto taarifa sahihi.
- Bado kuna watoto zaidi ya milioni 3 ambao hawapo shuleni na ushahidi mwingine huonesha kwamba idadi hii huongezeka kutokana na watoto wanaoacha shule.

2.0 MASUALA YA SERA

Wadau wa Baraza la Kitaifa la Sera walitambua kuwepo kwa hali inayoweza kufanikisha SDG 4 hapa Tanzania. Kuwepo kwa sera ya elimu bila malipo (Sera ya Elimu na Mafunzo, 2014) kwa muda wa miaka 11, Mkakati Jumuishi wa Kitaifa na sera ya jinsia n.k. huthibitisha msimamo imara wa Tanzania kutekeleza SDG 4 na 5, Ajenda ya Elimu 2030 na Mkakati wa Elimu wa Bara la Afrika (CESA). Hali hii hutoa fursa zaidi kwa kuharakisha mafanikio katika sekta ya elimu Tanzania kwa kulenga hasa ujumuishi na haki sawa katika sekta. Kutenga na kuwekea vipaumbele kwa Elimu ya Awali, elimu ya wasichana, watoto wenye mahitaji maalum na watoto nje ya shule itasaidia kukabiliana na ukosefu wa haki sawa pamoja na kupunguza umaskini.

Miradi ya kijamii katika sekta ya elimu Tanzania inaweza kufikiriwa upya ili kuhakikisha kwamba mkakati wa lishe kitaifa, ruzuku za shule na miradi mengine inayolenga mahitaji katika jamii, inalenga pia kupunguza mzigo wa wazazi ili kushughulikia vizuri zaidi maslahi ya kikundi lengwa. Sera na mfumo kisheria unaoambatana na sera vitasaidia kuonesha njia vizuri zaidi na pia kutenga fedha za kutosha kwa ajili ya miradi ya kijamii katika sekta ya elimu.

Tanzania inatoa fursa kwa utoaji wa elimu bora jumuishi bila malipo iwapo fursa zote za kugharamia elimu jumuishi zimetafutwa na kutumika hasa na msimamo imara zaidi kutetea misingi ya haki sawa na utawala bora. Hatua zinazochukuliwa kuziba miyanga ya kukwepa kodi, rushwa na ubadhirifu wa fedha za umma zinatoa fursa nzuri zaidi za kufanikisha SDG 4 na 5. Uwajibikaji endelevu na hatua za kinidhamu dhidi ya watumishi wa umma wasio weledi na hatua za kupunguza matumizi zitasaidia kuhakikisha uwezo wa kugharamia elimu jumuishi na hakisawa Tanzania.

3.0 MAPENDEKEZO YA SERA

Baraza la siku mbili la serikali na asasi za kiraia kuhusu sera ya elimu lilikubaliana kwa sauti moja kuhusu maeneo muhimu kadhaa ya elimu yanayotakiwa kupewa kipaumbele. Baraza lina imani madhubuti kwamba maeneo haya yakitekelezwa kikamilifu, sekta ya elimu ya Tanzania itashuhudia kuboreshwa sana.

1. Kubuni vyanzo mbadala nchini ya kugharamia sekta ya elimu

- Asilimia fulani ya Kodi ya Ongezeko la Thamani (k.m. 5%) itolewe kwa sekta ya elimu. Fedha zinaweza kuwekwa kwenye mfuko maalum wa elimu na kutunzwa na msimamizi wa mfuko huo. Kisha msimamizi ataomba idhini ya bunge kugawa fedha hizo kwa utoaji wa pembejeo za shule na rasilimali katika sekta ndogo za elimu hapa Tanzania. Baraza lilivutiwa sana na mfano wa aina hii kutoka Ghana.
- Inapendekezwa kwamba pesa zinazotokana na kampuni za mawasiliano (Vodacom, Airtel, Tigo, Zantel na TTCL) zigawiwe moja kwa moja kwenye sekta ya elimu. Pesa hizi ziwekwe kwenye mfuko usioingilika ili kuhakikisha pesa hazigawiwi vibaya.
- Ilipendekezwa kwamba Mrabaha ya Madini na Gesi igawiwe zaidi kwa sekta ya elimu. Mantiki ya pendekezo hili ni kwamba, kwa kuwa madini (extractives) ni rasilimali isiyoweza kurejeshwa, njia bora ya kuwekeza hizi pesa ni kuwekeza katika mustakabali wa Tanzania - watoto wetu.
- Inapendekezwa zaidi kwamba angalau 30% ya Mfuko wa Kuendeleza Jimbo itengwe na kulengwa kugharamia elimu katika maeneo kadhaa.
- Aidha baraza lilipendekeza kwamba asilimia fulani kutoka sekta ya utalii (k.m. 10%) irudishwe kwenye maeneo ya utalii - vijiji kwa ajili ya kuwekeza kwenye sekta ya elimu.
- Wadau wa serikali na asasi za kiraia walipendekeza pia ongezeko la bajeti ya elimu hadi kufikia lengo la kimataifa la kutenga 20% ya bajeti ya nchi kwa ajili ya elimu ili kuzidisha fursa ya kusoma kwa wote nchini Tanzania.
- Aidha ilifahamishwa na kupendekezwa kwamba kijiji cha Kikanda Wilayani Kilwa, katika mwaka uliopita, kupitia kwa sheria ndogo ya marejesho 20% iliyopitishwa kuhusu makusanyo ya mazao ya kijiji kama vile ufuta, mapato kutoka kwenye kijiji yalifikia takriban Tshs milioni mia mbili. Iwapo kiasi hicho kilielekezwa kugharamia elimu kitaleta mabadiliko makubwa katika shule ya

msingi ya kijiji. Sheria ndogo kama hii inaweza kupitishwa katika vijiji vyote vya Tanzania na kwa kila zao kijijini ili kuimarisha ubora wa elimu.

- Tanzania inapoteza mapato makubwa sana kupitia kwenye kodi, kama ilivyooneshwa katika taarifa yenye kichwa: “The One Billion Dollar Question Revisited: How Much is Tanzania Now Losing in Potential Tax Revenues Second edition, May 2017”. Utafiti huu ulifadhiliwa na Interfaith Standing Committee on Economic Justice and the Integrity of Creation (ISCEJIC: TEC, BAKWATA and CCT) na kuandikwa na Mark Curtis (www.curtisresearch.org) pamoja na Profesa Prosper Ngowi wa Chuo Kikuu cha Mzumbe Dar es Salaam.

Utafiti huu mpya unaonesha kwamba Tanzania inaendelea kupoteza rasilimali nyingi sana kila mwaka - na hali hii inazidi kuongezeka. Utafiti unakadiria kwamba **Tanzania sasa hupoteza takriban \$1.83 bilioni (Tshs. 4.09 trilioni)** kwa mwaka kutokana na misamaha ya kodi, utorohaji haramu wa fedha, kushindwa kulipisha kodi sekta isiyo rasmi na aina zingine za kukwepa kodi. Huenda nchi inapoteza \$1.3 bilioni (TShs 2.9 trilioni) zaidi kutokana na ufisadi katika bajeti ya kitaifa, jambo ambalo linachepua rasilimali ambayo ingeharamia huduma muhimu za umma.

Iwapo hizi \$1.83 bilioni zilizopotea zingetumika kugharamia huduma za jamii zingeweza:

i - Kuongeza mara tatu bajeti nzima ya afya ya serikali, au

ii - Kuongeza bajeti ya serikali ya elimu karibu mara mbili.

- Aidha tafiti na taarifa mbalimbali zilionyesha kwamba sekta isiyo rasmi ni ya kwanza kusababisha kupoteza mapato ya serikali, kushinda hata sekta ya madini. Hii itaongeza wigo wa kodi ya TRA ambayo sasa inasemekana kuwa chini ya milioni tatu TSH. Kwa hiyo, ni muhimu sana kurasimisha yote yasiyo rasmi na 20% ya yaliyokusanywa yaelekezwe kwenye elimu.

2. Vipambebele katika kugharamia sekta ya elimu:

- Baraza kuhusu sera ya elimu lilikubaliana kwa kauli moja kwamba Serikali ya Tanzania haina budi kuwekeza zaidi katika sekta ya elimu - kama sekta nambari moja - na kutekeleza kikamilifu Sera ya Elimu bila Malipo ili kusawazisha fursa kielimu kwa watoto wote Tanzania.
- Kugharamia elimu zaidi kutokana na vyanzo vya ndani ya nchi, hivyo kutokana na mapendekezo hapo juu kunalenga pia kutokomeza ukosefu wa usawa Tanzania kwa kutumia fedha za elimu kwa watoto walio pembezoni - wakiwemo wasichana, watoto wenye mahitaji maalum na watoto nje ya shule - ili kuiwezesha Tanzania kutokomeza umaskini hivi karibuni na kupata jamii yenye usawa zaidi.
- Mgao maalum, mahsus, uliotengwa na kuwekwa kwenye mfuko usioingilika

unahitajika ili kushughulikia ukosefu wa usawa na ujumuishi katika sekta ya elimu.

3. Uwazi na Uwajibikaji katika Utoaji wa Elimu:

- Kuweka vipaumbele vya kugharamika ndani ya sekta ya elimu - kama ilivyooneshwa hapo juu - kuambatane na kufuatilia utoaji halisi wa fedha na matumizi ya rasilimali kwenye ngazi ya wilaya na shule. Uanikaji hadharani wa utoaji wa fedha utawezesha wakala zenye mamlaka na asasi za kiraia kufuatilia matumizi na usimamizi wa fedha hizo.
- Ushiriki wa jamii katika elimu unaweza kuboreshwa iwapo Kamati za Usimamizi wa Shule zinaimarishwa ili kuwa sehemu ya kusimamia na kufuatilia matumizi ya ruzuku na pembejeo na rasilimali kwenye ngazi ya jumuiya ya shule.
- Baraza lilipongeza uamuzi wa serikali wa kuondoa watumishi hewa na hivyo kuandaa fursa za kuajiri walimu stahiki. Aidha baraza lilihimiza serikali kuendelea kupambana na ukwepaji wa kodi na ubadhirifu wa fedha za umma na kuelekeza fedha zote zinazookolewa kugharamia huduma za jamii, hasa elimu.

4. Mipango ya Jamii ndani ya Sekta ya Elimu

- Programu ya taifa ya lishe shuleni ipangwe upya ili kuongeza fedha za kuwalisha watoto ili kuhakikisha ubora na uthabiti wa chakula kinachotolewa na pia kuwa kiungo kati ya lishe ya watoto na sekta ya kilimo. Inapendekezwa kwamba mazao ya shamba yanunuliwe na serikali kutoka kwa wakulima na kutumika kuwalisha watoto. Hii itasaidia pia kuwamotisha wakulima kuzalisha zaidi na kupunguza umaskini unaoambatana na kilimo cha kijungujiko.
- Inapendekezwa kwamba ruzuku ya shule igawiwe kwa namna ya kupambana kikamilifu na ukosefu wa usawa katika sekta ya elimu. Kwanza itolewe ruzuku ya msingi (kwa mfano \$1,000 kwa mwaka) kwa kila shule kila mwaka. Hatua ya pili iwe ni kupeleka shuleni ruzuku kwa kila mtoto (\$10 kwa kila mtoto) (kila muhula) kuhakikisha kwamba wasimamizi wa shule wana rasilimali na uwezo wa kuitumia kwa unyumbufu kukabiliana na mahitaji mahsusi ya wasichana maskini (kwa mfano pedi za wasichana, sare, vitabu n.k.), watoto yatima, watoto wenye mahitaji maalum n.k.

Hitimisho

Baraza lilihitimisha kwa kusema kwamba vipaumbele na madai ya sera hapo juu ni mageuzi kwa elimu Tanzania katika muktadha ya mifumo ya elimu kitaifa na kidunia, vikiwemo SDG 4 na 5, Ajenda ya elimu 2030, Mkakati wa Elimu wa Bara la Afrika (CESA) n.k. Kwa kweli, iwapo mpango unafuatwa kwa umakini, Tanzania inaweza kuwa miongoni mwa nchi za kwanza za Afrika chini ya Sahara, si tu kufikia elimu jumuiishi bora kwa wote lakini pia kutoa fursa zenye uhakika za mafunzo ya stadi na kujajiri kwa ajili ya vijana wake.